

DOMADOR YAMADERA

Domador Yamadera (nam je omo Rishshaku-ji) es uni ot plasmulti turis kones plasuni in lokal antefas ot Nipon, nam Yamagata, na es parti ot lokal maga Tohoku. Ili abe istor longa e interes tele e es in plas bel tele, plaskia optik antrop alegro multi admira intem plasperi. Ili es je fasil obten pro antropturis komon. Yamadera es pas fakteto in anu 860 kon flamamulti santa porta ot Enryaku-ji telene Kyoto. Dom sefal ot Yamadera es Konponchu-do. Ili es pas faktore in anu 1356 e abein stofpresen maga stofarbor ot Buda, na abe oktasenti anu. Antrop logo, na Konponchu-do es pas fakteto per muni Buda Jikaku Daishi Ennin, na tomi pas rokmulti maga pro fakteto domador dis. Sekuen fide paleo ot Nipon, antrop logo, na rok maga presen limit inter geo dis e sekuen. Konponchu-do abe je "Flama ot fide", na igni stopne dura mil anu. Yamadera abe kuadrideka dom e dom leban plasuni es nam Oku-no-in. Pro arive a dom na, antrop nesesa paso sur milsenti deka skala, na es lito e rotat inter rokmulti e arbormulti. Dom uni sur rut dis es Konponchu-do. A unisurbi ot skala abe portamaga nam "Nio-mon". Poste porta rut distribu a bi rut, rut destrane ot ili sefal a formaplan optik kon optik bel tele a bale sub. Rut bi paso direk a Oku-no-in. Sekuen rut antrop mitin lito maga "semizuka" kon poesi festi "haiku" grafin sur ili, graf a Yamadera per androfakto ot "haiku", Matsuo Basho:

静けさや岩にしみ入る蝉の聲

*Trankuil
e pasodia rokmulti
fono ot sikada*

Stofpresen ot Basho surpod sub Yamadera. Benkia poesi dis logo peri trankuil, promulti antrop inergo ne eureka fasil trankuil dura jur, akaus antropturis multi bisit jurtuta domador dis. Si ni optikpro trankuil, aribe in antemedijur o postetem.

Atentif, pro ebita fasilne lektur intem testu dis, nam auto tuta usa in testu dis es graf in forma basi ot ilis, mutane.

Igor Wasilewski
Filotmulti ot Lingua Sistemfrater
2023